

## *Sewē ŋa Pɔli wɪla torogo*

# **FILEMƆ**

### *wi yeri*

#### **Sewē wi nawa senre**

Sanga ŋa ni Pɔli wɪla pye naga sewe jeele na li yɔnlɔgi mbeli torogo, kɪla yala wi yen kaso. Ki sanga wi ni, Filemɔ wɪla pye wa Kolɔsi ca, wɪla pye ki laga ki legilizi woo wo wa. Pa tagafenne paa pye na gbogolo wa wi go ki ni na Yenŋele yenri. Pɔli wo wɪla ti, a Filemɔ wɪ si taga Kirisi wi na.

Kulonana wà la pye Filemɔ wi yeri, paa pye naa yinri Onesimu. Onesimu mege ki kɔrɔ wowi ŋa fɔ «Lere ŋa wi maa sagawa piin.» Ki kulonana wɪla fe ma yiri wa Filemɔ wi yeri, mæe kari wa Pɔli wi tanla wa kaso. Ma Onesimu wi ta wa Pɔli wi ni, a wɪ si taga Zhezu Kirisi wi na, a wɪ si Pɔli wi saga fɔ jɛŋge. Eɛn fɔ Pɔli wɪla pye Filemɔ wi wɔnlɔnana, a wɪ taga Onesimu wi na. Kɪ pye ma, a wɪ si yere ki yerewe mbe Onesimu wi pye wi sɔngɔrɔ wa Filemɔ wi yeri; katugu wa lasiri wi ni, ki yen ma yɔnlɔgɔ ma yo fɔ kulo ŋa ka fe mbe wɔ wa wi tafɔ wi yeri, pe maa le jɔlɔgɔ fɔ jɛŋge.

Ki kala na, Pɔli wɪla ki sewe ŋa wi yɔnlɔgɔ maa torogo Filemɔ wi kan. Wa sewe wi ni, wi yen na Filemɔ wi sunlu konaa naa yenri fɔ wi yenle Onesimu wi na; wiga ka yenle wi na paa kulo yen, eɛn fɔ wi pye paa sefɔ yen Kirisi wi kala na.

#### **Sewē wi yen ma kɔɔnlɔ yege ŋga na**

Sharaga 1-3

Filemɔ wi ndanlawa naa wi tagawa 4-7

Pɔli wɪla yenrege ka pye Onesimu wi kala na 8-22

Sharaga puŋgo wogo konaa duwaw senre 23-25

#### **Sewē paa wi torogo lere ŋa yeri wi sharaga ye**

**1** <sup>1</sup> Mi Pɔli, mi ŋa mi yen laga kaso wi ni Zhezu Kirisi wi tunngo ki kala na, mi naa sefɔ Timote, woro wège sewe ŋa wi pye maa torogo Filemɔ ma kan, mboro

ŋa ma yen we wɔnlɔngbɔɔ konaa we tunngo pyeyenle; <sup>2</sup> naa legilizi\* ŋa wi maa fili wa ma go wi kan, naa we sefɔ jɛle Afya wi kan konaa we malaga gbɔnyenle Arishipi wi kan. <sup>3</sup> We To Yenŋele lo naa we Fɔ Zhezu Kirisi wi ni, pe yinme naa yeyinŋge kan ye yeri!

### FilemƆ wi ndanlawa po naa wi tagawa

<sup>4</sup>Sanga o sanga mi kaa Yenŋele li yenri, mi maa nawa tuun FilemƆ ma na, na li shari ma kan; <sup>5</sup>katugu mà taga we Fɔ Zhezu wi na yege ŋga na, a Yenŋele li leele kpoyi\* pɔɔn ndanla yege ŋga na, miŋi logo. <sup>6</sup>Mi yen na Yenŋele li yenri fɔ tagawa mba pì we pye nuŋgba we ye ni, pi koro pila gbogo pila kee yege, jaŋgo yarijenge ŋga fuun ki yen we wogo wa we yinwege ki ni Kirisi wi ni, maga jen ma wali ki na. <sup>7</sup>Sefɔ, ma ndanlawa pìlan kan nayinme gbɔɔ ni, ma kotogo kan na yeri, katugu Yenŋele li woolo kpoyi mà pe kotogo ki sogo pe na.

### Pɔli wila yenrege ka pye Onesimu wi kala na

<sup>8</sup>Ki kala na, ali maga ta Kirisi\* wì fanŋga kan na yeri mbe ya mbe kala na ma daga mbe pye li konɔ kan ma yeri, <sup>9</sup>een fɔ, konaa ki ni fuun, mi yen naga jaa mbe yaraga ka yenri ma yeri, ndanlawa mba pi yen we sɔgɔwɔ po kala na. Mi Pɔli, mi yen nɔɔ yenri, mi ŋa mi pye naŋa lelee, mbe taga wa ko na, mi ŋa yingɔ mi yen laga kaso Zhezu Kirisi wi kala na. <sup>10</sup>Mi yen nɔɔ yenri Onesimu kala na. Wì pye na pinambyɔ wa we gbogolomɔ pi ni Kirisi wi ni, laga kaso wi ni. <sup>11</sup>Faa wi sila pye na kala yɔngɔ ma kan. Een fɔ, koni, wi yen na kala yɔngɔ ma kan, na kala yɔngɔ mi fun na kan.

<sup>12</sup>Mi yen naa torogi ma kan, wo ŋa wi yen paa na wire ti laga ka yen we. <sup>13</sup>Mila pye naga jaa wi koro laga na ni mbanla ta laga kaso wi ni Sentanra ti kala na, jaŋgo wila kala yɔngɔ na kan ma yɔnlɔ. <sup>14</sup>Een fɔ, mi woro naga jaa mbe kala la pye, na mee yere na na, jaŋgo kajenge ŋga ma yaa pye na kan, kiga ka pye ma yeri jorowo kala. Een fɔ, ki pye ma nandanwa kala.

<sup>15</sup>Kana Onesimu wila laga ma na wagati jenri ni, jaŋgo maa ta naa wi pye ma woo wagati pyew. <sup>16</sup>Wi woro kulo naa, een fɔ, wì we kulo na. Wì pye we sefɔ ma we ndanla. Wi kala lilan ndanla fɔ jenge. Een fɔ, wi kala li daga mbe mboro ndanla naa mbe we, mboo ta wi yen senwee pyɔ naa we sefɔ wa we gbogolomɔ pi ni we Fɔ wi ni.

<sup>17</sup>Ki kala na, na kaa pye maa na jate paa ma pinleyenle yen, maa yigi paa yege ŋga na màla yigi we.

<sup>18</sup>Na kaa pye wɔɔn durumumu yaraga ka na, nakoma na kaa pye ma fɔgɔ yen wi na, maa ki jate na go na.

<sup>19</sup>Mi Pɔli, mi jate mila ki senre nda ti yɔnlɔgi na kee ki ni, fɔ mi yaa kaga fɔgɔ ki tɔn. Mi woro na jaa mbɔɔn nawa to ki na fɔ mboro jate na fɔgɔ ŋga ki yen ma na, ko ki yen fɔ mboro jate mɔɔ ye kan na yeri.

<sup>20</sup>Ee, sefɔ mila ma yenri, maga kala li pye na kan we Fɔ wi kala na. Mala nawa pi yinŋgi na na paa ma sefɔ yen wa we gbogolomɔ pi ni Kirisi wi ni.

<sup>21</sup> Mi taga ki na ma yo sɛwɛ ɲa m̀ torogo ma kan, ɲga m̀ yenri ma yeri, ma yaa ki pye mbanla kan. Ma yaa sigi pye yɛrɛ mbe wɛ ɲga m̀ yenri ki na. <sup>22</sup> Maa go pyɔ wa gbɛgɛlɛ wa na kan fun, katugu na jigi wi yen ki na fɔ Yenɲɛlɛ li yaa ye yenrɛwɛ pi logo, mbe yenle ki na mbe sɔngɔrɔ wa ye yeri.

### **Sharaga pungo wogo**

<sup>23</sup> Epafirasi ɲa laga kaso na ni ja Zhezu Kirisi wi kala na, wɔɔn shari. <sup>24</sup> Mariki, naa Arisitariki naa Demasi kooa Luki, na tunɲgo pyeyɛɛnle wele, pɛ ye shari.

<sup>25</sup> We Fɔ Zhezu Kirisi wi yinmɛ pi pye ye ni!